

Geiq Baez Vahcuengh Byaujyenj Doxdax Ndeu

记一次壮话表演比赛

贵港市覃塘区蒙公乡高占小学三年级 黄茂晨

2015 nienz 10 nyied 30 hauh, gou youq Nanzningz camgya Vahcuengh byaujyenj doxdax, siengj daengz yaek hwnj daiz byaujyenj, gou angq raixcaix!

Ngoenz haenx, gyanhaet hwnqcongcz, gou gig gikdoengh, youq gwnz congcz youh diuq youh dik, youh gangj youh riu. Gwn gvaq haeuxcaex, couh hainduj dajcang lo, lauxsae bang gou daznaj, sien daz daejhau, caiq daz gemjnding, gaendwk veh bwnda, doeklaeng daz naengbak nding, yienznaeuz mbwn nit, hoeng, ndawsim gou cix raeujrubub.

Daeujdaengz dieg doxdax Gvangj-

sih Swlfan Yozyen, gizhaenx miz boux camgya doxdax, miz bingzvej lauxsae, lij miz haujlai bouxyawj dem. Byaujyenj doxdax hainduj lo, daeggo dahcej youq gwnz daiz byaujyenj, bouxyawj bekfwngz mbouj dingz, hoeng, gou mbouj miz sim yawj, cij siengj vaiq di daengz gou hwnj daiz. Aen youh aen cezmuuz gvaqbae lo, daih 12 aen cezmuuz, daengz gou hwnj daiz byaujyenj lo, gou sing hung ciengq diuzgo "Son Mwngz Hag Sawcuengh", daengx aen hoihciengz cij dingqny singgo seuqset gou, gou lumz swlgeij cingq youq gwnz daiz doxdax, lumzbae laj daiz miz bingzvej lauxsae caeuz

bouxyawj, gou sim'angq dwk doq ciengqgo doq diuqfoux, miz haujlai bouxyawj ciengj dwk ingj siengq gou, miz baenzlai vunz gyaex gou, gou sim cungj fiz lo. 3 faen cung daiq dinj lo, gou caen siengj caiq ciengq yaep ndeu, hoeng, yinhoyz gaenq dingz lo, gou cijndei gungjhwet docih daihgya, laj daiz sikhaek yiengj hwnj baenz raq baenz raq sing bekfwngz, haujlai nanz cungj mbouj dingz roengzdaeu.

Daengz seiz gungbu cingczik lo, gou gikdoengh youh gaenjieng, dang rox swlgeij ndaej 86. 40 faen seiz, gou "nga" dwk cuengq sing daej lo, dahcej daeggo cungj siengj banhfap daeuj nai



(doz swliu)

gou, lauxsae bang gou uet raemxda, hoeng, gou ndawsim lij gig nanzgvaq.

Baez doxdax neix, yienznaeuz gou mbouj ndaej daih'it mingz, yienznaeuz miz di nanzgvaq, hoeng, de dwg duj va gyaundeideu, hai youq ndaw gwndaenjou, gou nyienh dawz duj va neix ciengxlwenx yo youq ndawsim gou.

(指导老师: 韦江萍)



Fwjhaemh

晚霞

贵港市覃塘区蒙公乡高占小学三年级 雷振越

Daengngoengz hoengzfwdfwd yaek doek roengz bya lo, de sou gij nditndat hwnjdaeu, cij lw aen giuzfeiz hoengzyanyan ndeu.

Mbouj gvaq geijlai nanz, giuzfeiz mbouj raen lo, henz dinmbwn saek fwjhaemh ronghsag, gyaundeideu dangqmaz, gij saek fwj geijlai saenzgeiz ha, miz saekhenjgim, miz saekndinghoengz, miz di saek gou cungj caengz raen gvaq, lauheiyou bouxcanghveh cungj veh mbouj ok cungj saek haenx bw, gij saek ingj roengz gwnz dieg daeuj, go'nywj gofaex hix bienq henjgim lo.

Gou sijsaeq bae yawj gwnz mbwn, gwnz mbwn lumj miz duzlungz raezrangrang ndeu, duzlungz daengx ndang henjrwgrwg, de ndonj hwnj ndonj roengz, gwn fwj haiz mok, boq ok va raemx gyaundeideu raixcaix, gou nunu lwgda caiq yawj, duzlungz couh mbouj raen lo. Fwjhaemh caen lumj boux sajmozsuz saenzgeiz ndeu ha, siengj bienq gijmaz saek couh bienq gijmaz saek, siengj bienq gijmaz yiengh couh bienq gijmaz yiengh.

Doeklaeng, lauxsae lwnh gou, fwjhaemh baenzneix gyaundeideu, dwg aenvih daengngoengz doek bya seiz, gij ndit ndonj gvaq dagicwngz nanwt seiz, deng daihliengh hoengheiq fwnhswj sanq fat baenz gak cungj saek, saekhoengz caeuz saekhenj fat ok cei q lai, ndigah raeuz yawjraen fwjhaemh dingz lai dwg saekhoengz caeuz saekhenj.

Daswyenz geijlai gyaundeideu, geijlai saenzgeiz ha, gou gag roengz gietsim: Majhung le, itdingh aeu ndeindeideu bae ra ok mimiz daswyenz.

(指导老师: 韦江萍)

Gvaqcieng

过年

贵港市覃塘区蒙公乡
高占小学三年级 覃星钊

Gou gig maij gvaqcieng, aenvih gvaqcieng gig nauhyied, yienghyiengh cungj moq, miz ndei gwn, youh ndei guhcaemz, dauqcawq cungj dwg angqvauvau.

Daengz ndwenlab, gak ranz gak hoh hainduj guh fungcangz lo, ngoenz 25 gvaq le, couh nyouq daengz haeuxfaengx rangfwdfwd lo, gou ngah gwn faengx, ngoenzngoengz gwn hix mbouj mbwq. Daengz ngoenzndaep, ranzranz cungj nyaengq nem doiq nem fukveh, gou yawjraen daxboh dawz mbawveh cih "福" nem dauqdingq lo, gipmuengz naeuz: "Daxboh, mwngz nem dauqdingq lo." Daxboh riuho ho naeuz: "Mbouj law, haenx dwg gangj '福' dauq lo."

Gyanhaemh, dou daengx ranz vunz naengh youq henz daiz gwn caeuz, gwnz daiz baij miz haujlai cungj byaek, miz nohmou, nohgaeq, nohbit, nohbya…… daihgya miz gangj miz riu, bouxboux aennaj lumj dujva hailangh nei. Gwn caeuz gvaq le, gou yawjraen daxmeh daegdaengq youq ndaw gu ndaw rek louz di ngaiz di noh ndeu, gou gamjdaengz gig geizheih, daxmeh riu naeuz: "Bibi cungj miz lw ma!" O, laxlawz dwg yienghneix.

Ndwencieng coit, gou daenj geu buhmoq, angqvauvau bae goengheij daxboh daxmeh, daxgoeng daxbuz, daeg' au mehsimj…… cij byaij yaep ndeu, ndaw daehbuh gou couh bongzboedboed lo, haenx dwg cienzlok gyoengqde hawj gou! Daxgoeng gangj, duzfanzg cei q lau lwgnyez ndaw daeh raek miz cienzlok lo. Gou yaek dawz cienzlok sou ndei, gvaqlaeng aeu daeuj cawx saw cawx bit bae hagdangz doegsaw, gou lij siengj cawx gouh haizmoq he hawj daxbuz dem, hawj daxbuz rox gou gyaex de.

Daj ngoenzndaep daengz ngoenz cibhaj, dou moix ngoenz cungj gwn ndei youq ndei, ngoenzngoengz angqvauvau. Ndwencieng gvaqbae lo, raeuz youh maj hung bi ndeu lo, gou youh miz dajsuenq moq lo.

(指导老师: 韦江萍)

Bingzdenz Va'ngaeux Gyaundeideu

美丽的平田荷花

贵港市覃塘区蒙公乡高占小学三年级 韦墨



Baengzyoux, mwngz bae gvaq Bingzdenz lwi? Haenx dwg Gveigangj Si Cindangz Gih aen mbanj iq ndeu, giz neix gingjsaek gig gyaundeideu.

6 nyied ngoenz ndeu, daengx ranz gou bae Bingzdenz youz, daeujdaengz Bingzdenz, yawjraen baihnaj dwg benq daemz ngaeux ndeu. Gou vaiq di byaij baenaj, ha! Aen daemzngaex gvangqlangh yawj mbouj raen haenz. Ndaw daemzngaex hai miz haujlai va-ngaex, miz hau, miz mbaeq, miz nding…… gou yawj duj neix, youh yawj duj haenx. Va-ngaex gak duj miz gak yiengh, mizmbangj ngamq loh ok valup soemsetset, mizmbangj lumj

dahsau launyaenq, cij loh ok di naj ndeu, mizmbangj lumj daegmbauq mbeihung, cungj loh ok najaek, youq laj ndit simmaengx diuqfoux. Baenz mbaw baenz mbaw mbaw-ngaex luenzlulu, lumj baenz aen baenz aen liengjheu iq nei gang youq gwnz raemx, bya' iq youq ndaw raemx youz baeg le couh youq laj "liengj" yietbaeg. Rumz baez ci daeuj, va'ngaex mbawngaex bi bae bi dauq, gizgiz cungj dwg hei qva rangfwdfwd.

Bingzdenz Va'ngaex gyaundeideu raixcaix, angqcoux daihgya daeuj Bingzdenz ngonz va-ngaex.

(指导老师: 韦江萍)